

# “ARHIVSKA PRAKSA” U TUZLI

Esaf Lević, prof.



## ABSTRAKT

Tema rada je “Arhivska praksa”, međunarodno savjetovanje arhivista i arhivara koje se ove godine održalo po 25. put u Tuzli. U povodu obilježavanja značajnog jubileja priređene su i otvorene dvije izložbe: “Neorenesansna arhitektura Budimpešte” koju su radili kolege iz Arhiva grada Budimpešte i izložba pod nazivom “25 godina Arhivske prakse u Tuzli” i prateći katalog što su ih radili zaposlenici Arhiva Tuzlanskog kantona. Kao sastavni dio navedene manifestacije iz štampe je izašao i 15. broj časopisa “Arhivska praksa”. Također, promovisana je i publikacija “Časopis Arhivska praksa (1998.-2012.) – doprinos razvoju arhivske djelatnosti u Bosni i Hercegovini (u povodu petnaest godina izlaženja)”. U radu ćemo se osvrnuti na tok savjetovanja te dati kratak pregled izložbi i sadržaja kataloga, časopisa i publikacije.

**Ključne riječi:** Arhiv Tuzlanskog kantona, Arhivska praksa, arhivisti, arhivari, savjetovanje, izložba, časopis.

## 1. UVOD

JU Arhiv Tuzlanskog kantona, uz svesrdnu pomoć Društva arhivskih zaposlenika Tuzlanskog kantona, dugogodišnji je i uspješni organizator i realizator međunarod-

nih savjetovanja arhivista pod nazivom "Arhivska praksa". Ove godine u Tuzli je, 27. i 28. septembra, održano jubilarno, 25. po redu, savjetovanje. Pokrovitelji manifestacije bili su Federalno ministarstvo obrazovanja i nauke i Ministarstvo obrazovanja, nauke, kulture i sporta Tuzlanskog kantona, medijski pokrovitelj bila je JU Radio-televizija Tuzlanskog kantona, a generalni sponzor "Kabas" doo Sarajevo. Savjetovanje "Arhivska praksa 2012" održano je u Hotelu "Tuzla".

## 2. IZLOŽBA "NEORENESANSNA ARHITEKTURA BUDIMPEŠTE"

U sklopu manifestacije, 26. septembra u 19 sati, na Galeriji Hotela "Tuzla" otvorena je i javnosti predstavljena izložba "Neorenesansna arhitektura Budimpešte", koju su priredili kolege arhivisti Csáki Tamás, Gábor Eszter, Hidvégi Violetta, Kemény



■ DETALJ ENTERIJERA ADAMOVE PALATE, FOTOGRAFIJA 1879.

Mária, Ritoók Pál, Vadas Ferenc i Winkler Gábor iz Arhiva grada Budimpešte (Republika Mađarska).

U Mađarskoj je 2008. godina proglašena godinom renesanse pa je tim povodom u Arhivu grada Budimpešte otvorena izložba planova i projekata neorenesansnih građevina u tom gradu.

U periodu između austrougarske nagodbe i jubilarne Milenijumske godine (1896.) glavni grad Mađarske je prošao kroz velike društvene i privredne promjene, što se odrazilo i na arhitekturu. Podignuta su mnoga monumentalna javna zdanja i stambene zgrade sa fasadama, portalima i stepeništima, karakterističnim za neorenesansu. Time je mađarska elita nastojala da se nadmeće sa veličinom i kulturnim renomeom građanstva italijanskih gradova 15. i 16. stoljeća.

## 3. 25. MEĐUNARODNO SAVJETOVANJE "ARHIVSKA PRAKSA 2012", HOTEL "TUZLA", 27.-28.09.2012.

Pripreme za uspješnu realizaciju tradicionalnog međunarodnog savjetovanja arhivista i arhivara u Tuzli, koji se održava pod nazivom "Arhivska praksa", počele su još u februar 2012. godine, formiranjem Organizacionog odbora<sup>1</sup> koji je usvojio teme koje će biti obrađene na samom savjetovanju. Ove godine to su bile slijedeće cjeline: 1. *Obrazovanje i edukacija arhivskog kadra – stanje*

1 Na VII (sedmoj) sjednici Predsjedništva DAZ-a TK, održanoj 10.02.2012. godine, donesen je Zaključak da se u postojeći Organizacioni odbor za Savjetovanje "Arhivska praksa 2012" kooptiraju Selma Isić, Hatidža Fetahagić i Esaf Lević. Žurbom nastalom nedostatkom vremena usljed okolnosti uvećanih predizbornih aktivnosti imena novih članova OO nisu štampana u Časopisu. Za predsjednika OO imenovan je dr. sc. Izet Šabotić, doc.



■ UČESNICI 25. MEĐUNARODNOG SAVJETOVANJA "ARHIVSKA PRAKSA 2012", KRISTALNA DVORANA, 27.09.2012. GODINE

*i perspektive*; 2. *Stanje i zaštita registraturne građe imalaca koji se nalaze u fazi statusnih promjena*; i 3. *Aktualna pitanja arhivske teorije i prakse*. Na Raspis tema upućen arhivima u Bosni i Hercegovini, Crnoj Gori, Albaniji, Hrvatskoj, Kosovu, Sloveniji, Srbiji, Makedoniji, Mađarskoj i Slovačkoj pozitivno je odgovorilo 83 arhivista koji su dostavili svoje radove. Na samom savjetovanju, u skladu sa usvojenim Programom rada, prezentovano je 49 radova. Prvog dana rad se odvijao po sesijama tako da su predavanja iz *Teme 1* održana u Kristalnoj dvorani (ukupno 16 radova kolega iz arhiva Novog Sada, Sarajeva, Tuzle, Zagreba, Beograda, Trsta/Maribora, Celja i Maribora), a predavanja iz *Teme 2* u Kongresnoj dvorani (ukupno 12 radova kolega iz arhiva Kragujevca, Skopja, Trsta, Varaždina, Bratislave, Ljubljane, Novog Sada, Kikinde, Budimpešte, Užica i registrature UKC-a Tuzla). Nakon završenog radnog dijela Savjetovanja izvršen je stručno-edukativni obilazak kulturno-historijskog i prirodnog naslijeđa Općine Kladanj. Drugog dana rad se odvijao u Kristalnoj dvorani, obrađena je *Tema 3*, a prezentovan je ukupno 21 rad kolega iz arhiva Maribora, Sarajeva, Zagreba, Brčkog, Tuzle, Bratislave, Kopra, Osijeka,

Novog Sada, Beograda, Subotice, Požarevca i Bihaća.


U toku savjetovanja svoje proizvode i usluge predstavile su firme koje se bave prodajom arhivske i informatičke opreme: *Kabas doo* Sarajevo, *Mikrografija d.o.o.* Sarajevo, *Itineris d.o.o.* Tuzla, *Procom d.o.o.* Gračanica, *Trevis d.o.o.* Sarajevo, *Primat logistika d.o.o.* Hrvatski Leskovac i *Imel software* Lukavac.

#### 4. ČASOPIS "ARHIVSKA PRAKSA" BR. 15

"*Arhivska praksa*" br. 15 izašla je u izdanju Arhiva Tuzlanskog kantona i Društva arhivskih zaposlenika Tuzlanskog kantona. Časopis svojim sadržajem daje doprinos razvoju arhivistike, posebno njenog praktičnog dijela. U strukturalno-konceptualnom pogledu, identičan prethodnim brojevima, prezentuje stručne i naučne sadržaje kroz pet utvrđenih rubrika: *Arhivistika i arhivska služba*, *Iz drugih časopisa*, *Građa*, *Prikazi i ocjene* i *Izvjestaji*.

U prvom dijelu objavljeni su radovi koji su, najvećim dijelom, prezentovani na radnom dijelu Savjetovanja. Objavljen je ukupno 41 rad. U rubrici *Iz drugih časopisa* štampan je rad "*Arhivsko zakonodavstvo kao preduvjet za uspješno obavljanje arhivske djelatnosti – primjer arhivskog zakonodavstva u Republici Sloveniji*"<sup>2</sup> mag. Zdenke Semlič Rajh iz Pokrajinskog arhiva Maribor. U rubrici *Građa* objavljeno je ukupno osam radova u kojima se obrađuje više važnih historijskih pitanja, te prezentuju zanimljivi historijski izvori pohranjeni u Arhivu Tuzlanskog kantona. Ovi sadržaji zbog

<sup>2</sup> Rad je objavljen u časopisu *Glasnik arhiva i Arhivističkog udruženja u Bosni i Hercegovini*, br. 41., Sarajevo 2011.



svoje izvornosti i sadržajnosti predstavljaju značajan doprinos razvoju bosanskohercegovačke historiografije. U rubrici *Prikazi i ocjene* predstavljeno je deset zanimljivih arhivističkih i historiografskih publikacija, objavljenih u Bosni i Hercegovini i zemljama okruženja u posljednje dvije godine, što nam omogućava upoznavanje i praćenje arhivističkih, informatičkih i historiografskih dostignuća. Rubrika *Izveštaji* sadrži šest saopštenja informativnog karaktera o stručnim, naučnim i kulturnim sadržajima realizovanim u zadnjih godinu dana u Bosni i Hercegovini i okruženju.

##### **5. "ČASOPIS ARHIVSKA PRAKSA (1998.-2012.) – DOPRINOS RAZVOJU ARHIVSKE DJELATNOSTI U BOSNI I HERCEGOVINI**

**(u povodu petnaest godina izlaženja)"**

Izdavači navedene publikacije su Arhiv Tuzlanskog kantona i Društvo arhivskih

zaposlenika Tuzlanskog kantona. Autor je dr. sc. Izet Šabotić, a cilj mu je bio pokazati stručni i naučni sadržaj časopisa "Arhivska praksa". Naime, u 15 brojeva časopisa objavljeno je više od 600 radova na teme iz oblasti arhivistike i kulturne historije. Navedene radove autor je predstavio u publikaciji, što će biti od velike koristi svima koji imaju interesovanja u ovim stručnim i naučnim oblastima. Dodatnu vrijednost predstavlja činjenica da je urađen prevod publikacije na engleski jezik.



##### **6. IZLOŽBA "25 GODINA ARHIVSKE PRAKSE U TUZLI"**

Izložbu "25 godina Arhivske prakse u Tuzli" priredili su, povodom obilježavanja značajnog jubileja Arhiva i njegove obrazovno-edukativne i stručno-naučne djelatnosti, zaposlenice Arhiva Tuzlanskog kantona Ešefa Begović i Saneta Adrović. Izložba se sastoji od 28 panoa na kojima je, hronološki i veoma pregledno, dočarana

atmosfera sa svih dosadašnjih savjetovanja. Prikazani su tu dokumenti koji svjedoče o napretku savjetovanja ka jednom od najprepoznatljivih obrazovno-edukativnih i stručno-naučnih skupova arhivista i arhivara na prostoru jugoistočne Evrope. Također, izložba sadrži i mnoštvo foto-dokumenata, kako onih sa otvaranja i samog toka savjetovanja, tako i onih nastalih prilikom stručno-edukativnih ekskurzija učesnika realizovanih u toku održavanja manifestacije, a što je također pohvalna tradicija. Izložba je bila postavljena u holu Hotela "Tuzla" tako da su otvaranju prisustvovali svi učesnici Savjetovanja, a priliku da je razgledaju i upoznaju se sa širokim spektrom aktivnosti Arhiva Tuzlanskog kantona imali su i drugi gosti Hotela.

## 7. KATALOG "25 GODINA ARHIVSKE PRAKSE U TUZLI"

(povodom održavanja 25. međunarodnog savjetovanja "Arhivska praksa" u Tuzli i izdavanja 15. broja časopisa "Arhivska praksa")

Kao prateći sadržaj urađene i postavljene izložbe od strane stručnih zaposlenika Arhiva Tuzlanskog kantona napravljen je katalog izložbe, štampan pod nazivom "25 godina Arhivske prakse u Tuzli" (povodom održavanja 25. međunarodnog savjetovanja "Arhivska praksa" u Tuzli i izdavanja 15. broja časopisa "Arhivska praksa"). Autori su Esaf Lević, Ešefa Begović i Saneta Adrović, dok je izdavač Arhiv Tuzlanskog kantona. U Katalogu je, na 24 stranice, pregledno prikazano i fotografijama obogaćeno svako do sada održano savjetovanje, a ista pažnja je poklonjena i časopisu "Arhivska praksa". Svoje mjesto su našle i fotografije učesnika Savjetovanja sa stručno-edukativnih obi-



lazaka znamenitosti kulturno-historijskog i prirodnog naslijeđa Tuzlanskog kantona.

## 8. ZAKLJUČAK

Širokim spektrom preduzetih aktivnosti zaposlenici Arhiva Tuzlanskog kantona su na dostojan način obilježili još jedan značajan jubilej ove Ustanove. Za tu priliku postavljene su i za javnost otvorene dvije arhivske izložbe te pripremljena, štampana i promovisana tri izdanja: Časopis "Arhivska praksa" br. 15, publikacija "Časopis Arhivska praksa (1998.-2012.) – doprinos razvoju arhivske djelatnosti u Bosni i Hercegovini (u povodu petnaest godina izlaženja)" i Katalog "25 godina Arhivske prakse u Tuzli" (povodom održavanja 25. međunarodnog savjetovanja "Arhivska praksa" u Tuzli i izdavanja 15. broja časopisa "Arhivska praksa"). Uspješna realizacija navedenih projekata potvrda je spremnosti zaposlenika Arhiva da odgovore savremenim zahtjevima arhivske struke i nauke te da na pravi način zadovolje potrebe šire društvene zajednice.



